

四庫全書

集部

欽定四庫全書

姑溪居士前集卷十九

宋 李之儀 撰

手簡二

與何給事

某為公家客久矣雍容談笑雖粗領風味獨未得于利害之途盤旋多事之際心固疑之而誠或未盡傾向也于是炳然乃知所疑為自失蓋德度之接無不主于至

誠而加惠哀蹇迥出常矩古人謂感愧則有之知己則未也不虞一旦無獲蒙被而其自失者愈知為可愧矣霜候盛寒恭惟台候起居萬福方遠參近更期以時保練即慶遷擢

又

此來不謂已晚汲汲所役僅能襄事故早時所願得于叅承之日三分不及其一末路何堪廢于此念或不見負今亦爾耳則其他可知不審高明亦知梗槩否浮雲

去來星日固在殊命之慶定在新正不妨激昂懽緒自
收未去之日爲邦人不可及之思也獨不果竟投勝韻
執筆惓惓

又

稍不獲瞻近懷詠高明尤甚平日冬候浸寒恭惟起居
佳勝衰晚待盡而已既遂叅承之願則其諸一付度外
尚幸再約趨風以竟款叩爾屬心門牆筆下何可見也

與楚守賈朝奉

託姻疇昔嘗謂淪落異地無復叅承之幸遲暮何堪遽
在末軌欣佩固已不貲而歲晚相求可量欽系江上苦
寒履况當復何似借地為客咫尺即在要顯尚稽展晤
倍劇傾馳

又

日者馳控特未卜見錄已否書來惇敘流渥豈勝愧戢
里中人情易擾風物飯食粗如人意伏計坐嘯之餘居
有多樂老境何日獲從井上出遇庶幾政績超騰徑躋

華近而缺斲之間擊節為應也

與金馬部

中玉

願親固久冗路低徊無階自達而復不當行李之便留
連鄙念蓋不待說而後知也于是遂有參承之幸則疇
昔湮鬱殆將一洗無餘矣求之異時端若有數霜候早
寒榮戟間闕邇來不審尊體動止何似見上應恨相見
之晚斯民懷慕非一朝夕不妨就陞顯職暫為一方之
福雍容少日徑席華近以協僉言也區區尤劇欣跂

又

自承命下屢次屬邸吏候大旆所舍皆報以未得其詳
繼聞已赴汝陰即紛走介脩慶就問起居尋獲邸申方
知遂席新渥猶未諭取道之方今日覩公移乃知由亮
宿以赴國門竊計朝晚入覲徐卜所向區區上記淹遲
庶在矜憫

又

陝右古郡風物飲食皆可人意雖曰道御賓客多自城

外往來可想及者有數固左右即可之地而偃藩之勝
似亦少能過之者筆吏已遣接人并什物供帳等一一
如旨誨謹已嚴備為待矣州宅深覩老木頽頽相錯北
顧大河天下之絕觀也不妨暫快登覽之適遂還寵要
在人實為無盡他有所戒敬服來命

又

日者得漕檄至長安既到而諸公皆並還矣遽承此委
欲訴以免不可得且不謂住此許久方其往尚有殘暑

凡禦冬之具皆不隨此已盛寒營葺不及甚以為懷大
施之來非特邦人聳跂而愚者參承為至幸遂獲早歸
自是私分上一不易得之事伏望稍促行軒不勝朝夕
引詠

又

此距京西才數十里界候最為淺促凡事隣邑不相關
如大施果欲少慰斯民之望敢期出郡之日豫戒邸吏
或隨行人急走一報州郡迎候自有常數不宜使之失

備且不及也惶恐

又

門中貴眷伏惟萬福今必同行矣東玉金玉想不輟通
問二舍各計安勝近皆相會已否容另附承動靜

又

近專遣人至京師上記竊計塵浼瞻望來旆我勞如何
適得報審將叩境上方此盛寒尊履佳勝諸懷非侍坐
不展朔風眷眷

又

承大旆已過國門日與斯民跂望玉趾掩回敬問蓋不
豫知遠近皇恐不能堪亦望有以見亮苦寒伏惟步履
之餘尊候萬福諸所欲言畧具前記要非促膝不展前
驅在吾睂睫間矣欣慰渠可名哉

又

方欲脩問專介遽被翰墨存拊愈厚感佩無已牙兵衛
從州郡常禮但愧遣行差緩爾或尚缺用當以見告應

命更佇委報

又

違去門下忽行役之拘不時上記亦意有以察其過而
懷詠眷存常在依邑臘寒比日不審尊候起居何似高
明豈今日持節明日擁旌者從容上前極口論天下事
使在廷聳然有疑得質遂皆信悉以席華近以慰一時
傾想而久未我契者顧豈遠哉修慶紬繹執筆敢吝

又

鄙拙早不如人蕭颯異時詎敢覬幸于知遇然往來伯仲間亦久矣其如邂逅綵衣之餘猶記彷彿而契義自求又將輾轉蒙冒迄未可得悵然此懷每懼終失孰謂一見欣然遂叩資藉延揖之盛以所獲于動容周旋而遺靈假寵之如此茲豈平平可見其盛遇耶至于尊俎豐隆祖帳華茂傾一意于俯路而至巷無居人則剪馬亦類其將何以為對歲晚致効幸或有得向風耿耿

又

迂拙背馳自干吏議到滿聞罷黜尋欲泊家一面赴調
于法須候交代不免迤邐西來所至親舊留連又繼得
漕檄俾往長安凡四十日方到故復淹滯送還人不免
有妨差使恐悚無已不審雅眷能復矜照否然路中雖
苦寒顧恤亦備盡走失才數人耳代者在蜀中杳不聞
耗勢當春初或得就道此中與比近有幹委事敢幸不
外至祝至禱

又

陝原僚友多佳士水鏡固不能逃其如春首有將替及
垂成者不得不仰圖門下敢望留念吳節推真實有守
敏而能文以其直實故人少知者司理董君介廉強果
事多賴之二人乃將替者其他尚可有待于異日僭易
輾轉惶恐惶恐

又

違去麾戟遽復踰時歸計既爾蹭蹬又軍事擁來意况
實極惡有愧于牽窘書問不繼果信其如是哉春候寢

暄伏惟靜鎮之餘尊候動止萬福陳力四方使節少休
便當濶步華近尚爾低徊是豈在我有不及耶天人未
始相遠卽慶褒異別對殊渥

又

願親固有日既幸資藉乃不得為從容計退訟歎然每
自日下來者皆能道經由瞻見比日起居之詳輒用為
慰區區代者不到四月中定獲叅展未間更祈善衛

又

蒙約意亦忽忽每圖明窓軟火清坐相向作無我語
以披氛翳之桔定將早晚可遂也陝服號當路然事絕
簡應接亦稀少向上工夫能不退轉否

又

昨日侍坐不甚欸晚熱猶可畏勢難稍久然所得于盛
義亦多矣清晨恭惟尊履佳勝時序忽忽曝衣乞巧遽
見節物豈老境歲月易得然耶可喜亦可歎也早晚再
圖展近

與蕭季文知錄

比承當路或不相容不敢仰叩所自此者遂知朝論取
直公理終不能屈果有是證君子不苟避就又復時評
在已耶然則超然遠舉似亦無足猶豫要之待其至而
後動無自皎皎或取愧于從容也仰投氣類輒爾惜況
當塗風物自可領略果不屑其陋則旦暮周旋私幸一
何多耶襄陽固不惡蓋剽聞餘論故利害因得自警不
勝翹跂小兒官期未決亦欲月終遣行雖託庇不久要

亦資藉輦好尤重攀緣之澤也偶作十餘書不暇謹悉
別圖申敘次

與彭丞

久不獲申致門下為力有限而所應不一忽忽易成荏
苒馳情眷舊未易咫尺可論也逼歲到家首辱流問所
以不相忘之義尤見惇篤時序推遷恭審廬次支勝瞻
望一水未果躬叙其殷懇之深尚冀併得展盡向風惘
然

與孫知縣

希賢

既不入城無緣瞻謁來者頗能道見恤之語感愧無踰
秋爽伏惟動履清勝旦夕遂歸系望軒屏倍深依向被
召北行庶幾迎謁

姑溪居士前集卷十九

欽定四庫全書

姑溪居士前集卷二十

宋 李之儀 撰

手簡三

上執宰

罪廢苟生屏息窮遠瞻望門仞如在雲外固不當輒修
記室之問然恩出一旦義均存歿是豈平平所得而擬
議者雖分同腐草其如餘息未殄則其情可容自巳耶

庶幾憐憫特賜省錄是身幾何顧不足以論報効期于
結草則猶未離乎類也竊謂隨所愛生此念常在一語
儻誣天實臨之引詠恩施形留神往

又

非意之酷莫此為甚儻非姓名猶在記錄則安能遽有
茲幸恩旨既臨舉家慟絕以所遇之如是則其感激銘
鏤不待形容而後可諒雨露不私于草木而草木蒙被
自有淺深自非力回造化未易有此服天地之仁佩鈞

陶之錫雖多言不過如此其惓惓所系惟自信其無有窮盡也

又

壬午歲聞被召自潁昌亟來獲見于國門外舟中蒙問勞甚渥矜惻相仍未幾自以罪去流落江上十五六年方其來時一妻一女子與其婦一孫并身而六相繼哭之念一身獨在晚才有此兒實相與為命而交造者知其如是遂用以快意果得其實固非所辭而乃繫風捕

影巧為訟端一墮橫逆又復五年不惟父子生離而特以官年六十有八豫計當叙之年則已七十遂當致仕祿食不繼固非所恤遂將自此以至屬續終不能脫于罪籍矣欽承至恩大德天地有盡而此則無盡使瞋目得為全人捨恩地尚何望哉向風不覺酸鼻

又

暑候滋熾恭惟雍容陟降鈞履萬福某衰晚一介於世不異疣贅流落既久不自知其生理可乘而日期朝露

之奄先每念獲齒門墻雖未得從衆人之後承顏接詞
周旋盛德之遇然所得所蒙固已如萬鈞之重常在負
荷而若不能勝端所謂子在回何敢死尚以是黽勉而
苟在也隙馳荏苒忽忽踰年霄壤變絕其交則氣與識
爾蓋無時不在光明中亦間容僭易輒通記室之問其
如破甑弊帚不以廢毀而居有眷眷不忍終棄之意佩
戴之深尤覺未即仰承旦暮為可憾于是義益高矣情
益厚矣瞻望恩席翼翼不暫捨于眉睫間咫尺將自慰

其繾綣且覲東甬以見從而叙謝則方且圖之邈風倍劇向往

又

比者伏蒙上恩特還愚息遂永祭祀之繼祇奉俛伏揮涕不知其已闔門悲感真若再生九原不昧銜仰可知傳聞里巷一口嗟惻流布所及莫不聳動具承天地之德不間幽側至深至厚而螻蟻微生草芥賤類驟爾叨蒙果有是事耶夢寐間也眷言此義倘非極竭展盡渠

能至于是哉訪古則或有之于時實未之見瞻詠門下
恨無羽翰可借而縮地之無術凡屬枯株但驚根葉頓
有數榮之向亟將自効于躬致一言之薦而未得爾臨
紙哽噎筆不得下者久之

又

自罹非橫五年于茲雖愚昧或致分同腐草而家世之
傳無斯須少忘困伏井底惟飲恨忍死期于尺素之得
伸而有再瞻天日之幸然而捨門下其將何地可控耶

早日得報備載生成之意出于特達故缺甃間覲覲不知自己夜以繼日尤如在沸鼎中前月又得報知德意已輒而天日遂將矣目窮心匱閱月而方得之于未得間其情可知既得之則其情又可知也姑急馳此介略布其端餘俟迺遷申展次

又

人與已雖父子之戚矣有時而不能同地與勢若風雲之會矣有時而不可合何則人各有所見而事亦有所

礙父子可同也乃或號泣而隨之風雲必合也亦有去
來而相背况君臣朋友之際哉以是為不易必又以甚
賤至微未嘗接眉目通語言遽蒙忘其不同與相背而
一語之發如石投水遂使挾山超海不為之難而枯木
寒灰果至于再作理固莫窮而世亦莫之遇也今日之
事是已蒙被已還惟自嗟駭不報之恩百身何據然上
雖不期報下其得而已耶百身有盡而志則無盡神理
其遠哉

又

竊伏草莽十五年矣殆若根蒂連結毫髮不容相遠自
冒齒錄即有請見親依之誠初不謂蹭蹬至今已而不
腆之所懇惻或與之輾轉資藉上投拯援既荷憫恤三
二年茲遂欲申其素志心往形留以日為歲尚爾差池
竟至不離尺寸而坐受大賜雖高照徹其形迹之間
可得不愧不忤已否止候措置目前猥瑣坐圖操筭平
陽之門矣仰冀重德厚恩終始矜察

又

久欲一望見門牆而淪廢孤外猶未得為全人故蹭蹬
未果自達老日益迫一旦奄先朝露則賡恨九原而自
絕于一代人物也既付與遭遇之如是而不畀之以早
其造物者果有意耶抑無意耶雖誦其詩讀其書不失
于心期亦非得已而言爾幸同聖日可使有憾于異時
乎溯詠之深惘然如失

又

竊伏榛莽瞻望門牆如隔霄壤然聖日光明同在一照
臨而系懷覆盆之下私淑為深尚稽叅展伏冀上體眷
注倍保崇重

又

恭審蔽自上心圖用傳器遂膺制拜迎愛旌旌中外懽
忭一口翕如是乃儲養有素理自應爾無階進陪賀客
之後延詠高牙倍馳丹悃

又

禮成樂作德化日新黼黻聲名輻輳遠近權衡所倚則
端蔓苦腴各得其適真所謂粲然如繁星麗天而舍次
之辨捨五行何分斯人望而畏者實仰盛德何日親被
提振向風惘然

又

近者輒以專介上浼記室最爾螻蟻之誠諒獲塵控春
陽不期于私而蒙被之歸實均纖草疏外鄙樸不知恭
事之容但獻芹炙背知其愛而不知其有犯更在矜恤

有以亮之

又

司勲張大亨舊學曾子固為文章整潔有程度而不妄形容蓋一時之秀也頗聞收宗學者之幸

又

繼有所介冒塵記室特以未遂忝承心如欲墜雖可謂激切然勢莫之應恩地常有眉睫間定將何日獲瞻望忽忽初暑日來緝熙羽翼益被親信天人所符台候動

止萬福造物既有以鍾之其必有以成之一代光明何
啻六五帝而四三王也所以周旋至是者復何人哉草
隨風靡不自知一介疏外之有間執筆耿耿

又

伏承討論之暇儲思前日翰墨遊戲之蹟流傳所先想
已充牣緘襲而近時所期如眉陽老人龍眠宗子固非
俗格而似亦不易得者輒意列鼎之飫不能無澗沼之
毛山林之茁投間而進舊有老人戲墨六扇一硯屏所

寄所錄詩兩軸龍眠所畫松上道人一軸御馬粉本一
軸乃盡所有而得於散失之餘者舉以投賞鑒蓋平日
與二人稍款玩于朝夕不知為可貴隨得隨失不能保
回視既往遂覺不能多取而謹藏之深可憾者別有家
傳吳生畫天王一軸此則開卷便可知上乘恩遇殆以
先祖得之迄今百有餘年甫為茲日爾僭易塵控諒矜
賜察

又

竊謂既為門下士則于門下種種不應有間方先公啟
手足以至奉窀穸皆不得自効于衆人之後及哀挽所
相又後時銜恨抱慙無以為控乃僭易狂斐有託于記
室不虞委眷逾厚過形謙謝伏讀愧畏莫知所容又復
一時迫于修附不果親寫雖情文未至鉏鋤而私懷不
能無所負謹繕寫上呈伏冀恩私特垂矜亮

又

每承真翰未嘗不反復吟諷幾至成誦紙敝墨渝欲捨

不得語高而意盡藻績見于隨得信絕世之文雄也平
日頗有味于此自獲委眷頓喻平日之習何止效顰愈
陋端如欲避影而走於日中其超然自有到處何可得
耶以是彌恨親依之晚而款席之尚遠也

又

比者專人回跪奉親翰欽承隆厚揆非其據雖包荒固
不遐遺而佩服之重既榮且感輒欲効儷句申展又慮
接武記室五技易窮其繾綣一介之誠則其勤不過如

是瞻望恩地但劇歸向

姑溪居士前集卷二十

欽定四庫全書

姑溪居士前集卷二十一

宋 李之儀 撰

手簡四

上時宰

初暑伏惟鈞履萬福比者無前之寶鼎然傑出穎卓之才因事尤振丕告列辟輝映相盛雖參以他務而并舉之然超軼絕塵則在是也加之制語有法事詞為稱辱

在品題遂因諦味已復成誦于所能誦則如見其人惟是不得從賀客之後倍深依向不宣

又

某自徹聲迹瀕二十年固能時見一斑于管窺文豹然親承警策如前人雖萬戶侯有所不願者定能終有茲幸已否門庭愈不可及諸有志者投間互進所長而規矩繩墨各得於一顰一笑因其所有亦或選掄之及拱把便知其材可指日遂至于合抱也萬牛回首一柱特

表自揆則非其輩類如得一竊歎于衆人之後足矣臨
筆增吝

又

某哀悴且復拙於養生而又旁無扶助故家食之日少
而農務之力多是亦造物者所以付之要之竊慕耒軌
其目寓手應固當因時以勉者氣已不振而牽制復乘
之真見負於幸得之際而有憾於無窮之瞋矣尚資竿
牘之賜時輒興起願親之勤尤覺既高益遠矣

又慰疏

某疏言日月流逝伏審先政太傅已經除祥恭惟攀號
躡踊五內分崩糜潰煩冤何所逮及孝思奈何罔極奈
何某伏限在遠不獲詣鈞屏祇候申慰瞻望摧哽可勝
欽系謹具疏不次

又

不審近日鈞履何似伏冀上體眷注無或追遠之過與
時御宜益茂久大

又

比者以所賜二經并寧先賜鍾銘見寄者欽承至性知
無以為泉下之報而上憑佛力以嚴因地可勝畏仰先
公履踐之素不待資崇固應超特其如純孝之篤深體
增上有教而恨無以自竭也謹當什襲時出而讀誦之
少助勤至亦自效其涓埃也鍾銘輒忘其鄙而賁緣於
諸作者之次僭易呈覽

又

祥除之及以僻遠豫不得其日故修敘獨後然禮意不
得而略庶幾恩炤有以加亮不遑致恭焚席仰承變服
但引詠巨愴遙深哽塞

與祝提舉

無黨

昨日庶幾展陪不圖鉏鋤良眷眷也早來伏惟起居佳
勝專介被問所以慰藉甚款感愧無論行李稍遽不獲
瞻望倍深約結介還方食具草記率皇恐皇恐

又

早來辱訪別少親妙悟尤慰披寫日高尚寒恭惟起居
佳勝于是大旆經行首賜臨問遂獲周旋燕俎所以存
拊款盡鄙陋何以為據非氣類曲敦疇克如此感服銘
佩倍深繾綣適到津亭已失浮驂度其勢不得申敬行
色系戀之迫庶幾見亮

又

某流落屏處不復通好游舊雖飲詠不少忘然門地日
益遠矣比辱暫屈使指但竊為一方致慶而不敢輒投

繾綣于是弭節尚意猶在省錄跼蹐願致之勤滋恨無地不圖加惠鼎臨遽先翰墨敦諭款悉如接盛遇秋冷感激而已他佇續貢不次

又

拜別忽忽踰時系詠雅睠但深約結累日方治行主于一見門下而北稍傳按部將復經由以故少留仰俟瞻叩遽先翰墨委諭詳盡尤佩不忘之意伏審乍冷起居佳勝百臆須款席可究不勝拳拳謹具參問

又

日者大旆經由巫走行府竊承會食州中已而聞改轅
北去竟不獲一奉教督歛焉鄙懷跂詠不少間庚伏邇
日不審尊體動止何似瞻望榮戟有必可見之地未有
其涯向風可勝約結

又

準擬還自信州便道獲款盡論不謂行李甚遽但劇引
詠相繼便圖上記五月中感寒疾已在必死之際偶爾

就安然汗雨復作淹回幾五十日矣今又愒愒氣僅相
屬書問不時端係於此亦必有以見諒久聞府事嬰拂
雖一方蒙被德澤其如方暑小勞應接不無自累也達
吾之所自信者以聽之固知無入而不自得也日期便
道參近倍深聳向

又

某到太平四周年第一年喪子婦第二年病悴涉春徂
夏劣然脫死第三年中妻女子相繼見捨第四年初則

癰瘡被體已而寒疾為苦于其中間人情不相當靡所
不有自忝冒叙復便欲迤邐北歸日復一日今幸苟生
勢不容更住矣輒不自外門下之舊瀕二十年雅辱知
憐且非旦暮于是如在井中去死地間不容髮引睇尺
素何啻再造故忘其僭易上千使臺暫借一寬舟只至
小陽渡往還無四十日自不妨別差使萬一不在所絕
敢冀此月下旬或二十間得之幸甚先望貶付照牒仍
得一寬潔差新者一家并亡妻靈柩同載不得不慮皇

悚皇悚

又

某賤累三房二十餘口又有靈樞先因唐欽叟處一舟
般載不盡又唐舟年深疎漏止可載輜重幸小子除服
合得一舟不得已上冒其詳筆下不能見但目即舉家
如爐炭上果蒙曲應殆非平日可比伏惟恩仁俯契真
切悚息悚息

又

某五月初寫下前啟相次得疾故修浼淹緩自取留滯
之累前啟更不易庶幾見念知其意非今日也惶恐皇
恐

與米元章

八月八日某某頓首再拜漣水使君元章公閣下伏自
拜違行四年矣書問不繼相遠之勢然也到京見交遊
尚未遍其見者道公動止與夫政事之在人口者十居
八九則知吾元章公有進而真不愧吾欽挹之素也如

何如何秋高氣清通日不審尊體何似行有召命未間
千萬加愛謹奉狀咨聞

又

某上啟元章漣水使君節下近委權貨遽當已塵浼京
師自六月至九月雨連晝夜不絕氣候已如冬月不審
淮上如何伏惟政成民樂履此初寒起居佳勝南來者
一口交譽謂自過揚子渡行路無不咨嗟頌詠每道及
公姓名則以手加額上不謂至此而猶未還召其勢亦

不能久矣更希善愛以對之

又

某啟末路間關獨得于公為多不謂一別便不蒙寸紙
則平日眷眷殆將委于草莽耶抑將有待於我而然也
近見子魯曾公書道公學術高明政事亹亹挽之不斷
企仰何及漣漪古郡距我松楸纔一水風化漸漬我亦
公桑梓之民也未能隨父老申敬麾下可勝耿耿或未
見忘時賜書教

又

改月伏惟起居佳勝祭享傷感殆不容遣免以故先承
降問兼辱元暉下顧敦叙稠重尤劇佩荷見命晚集敬
當祇赴只是食素不必具肉幸甚輒欲更求十數幅字
如此紙可用否必欲得何色目乃入用先告示及當攜
往也

與小米

元暉

紬紙為請別自一段因緣恐兩彩一賽輒煩過庭為了

之仍早得之甚幸流落人間乃是超世之物不易得者
今日之遇也挂念挂念

與彭學士

某啟久別教席仰詠不能已暑伏舟行良苦尊候起居
何似區區欽佩緒餘常有願親不足之懷于是又將西
去瞻望數千里未卜承侍之期臨書黯然敢冀委時自
衛鄙誠千萬益非書所能盡竊幸矜照

又

自承召命日計行李須郊外近見遽領教墨深愧已後時矣將聞德誨咫尺欣浣可知

又

兩日少故阻奉教席瞻向盛德義不少忘恭惟從者無恙承今日殿對遂即黼座問勞之際相慰淵衷佇望之久方出局偶餞一舊僚出城明日當叩師几

又

久不承師誨雖再具書而瞻仰拳拳蓋非紙墨可致者

其欲見之心朝夕東引伏辱手教曲記過存伏審赴召
已次都邑霜寒尊侯起居萬福出局遂造席末區區謹
俟侍坐

又

孤苦待盡久不得君子之教雖餘喘不復自理然向往
之私惟日北詠逝至忽辱手筆藹然風義未忘罪罰而
遷官之慶有愧為問之獨緩比日復不審履況何似恭
惟庭闈康靖眷聚均福書成尚在改歲常格所拘稍滯

雄奮古者治定功成之際玩心神明而沈敏之材多後
于躡等良務寬大以竚類求

又

今早講罷即詣直舍承駟衛已出晚尤毒熱伏惟尊侯
動止萬福少慕下風比得親侍將一月切仰高明欽戴
無已會此遷改遂失依賴下情瞻戀何似可言拘文非
假不敢輒詣牆屏謹奉手啟

與劉延仲

前日遣問承暫出翹仰為懷連日出城倦甚適方見中間所惠簡尋失為荅悚仄悚仄秋暑欣審侍奉萬福馬以病足見借馬出入亦必無用矣他日望宿戒也一二日相見有客才起草草

姑溪居士前集卷二十一

欽定四庫全書

姑溪居士前集卷二十二

宋 李之儀 撰

手簡五

與姚漕

某皇恐上啟運使戶部節下低徊仕路常在光明中地
偏人微無從瞻望比承振采一道而里舍所寓適依庇
疎欣慕所期實均有衆首夏清和恭惟尊體動止萬福

系詠門牆未獲通名將命尚冀哀遲或在記錄不宣

又

屏處江上忽二十年疇昔難忘常在欽挹敏茂詰洽表
儀多中故省戶使臺繼膺寵數而勢地既阻無從脩記
其知懷德固不少懈也比多在墳山失于承候今已在
衆人後矣亦鄙分所應爾也餘塵未拂尚幸按臨得從
賓客之末乃所願言庶幾侍坐披悉

又

退縮里巷實依德庇眷言疇昔蒙被有加拳拳負荷之
深未易形容可究也冬候未寒日來尊候動止何似委
寄固重而隨地振采下受其賜上收其効日聳褒顯遂
膺柄任非特一介私淑而然乃公論之所歸也引詠門
牆可量傾邇

又

中間使人蒙枉教尋欲修叙而持書人已不見差池重
意之辱寄顏無地哀晚兀兀待盡而已比聞暫總帥事

輒期一見以酬素志蒼顏白髮仰附後車之載或能上
助仁者愛老念舊之樂私庭無助凡米鹽瑣屑率身履
之用是蹭蹬向風何已故都可擇之勝固多乘時抑揚
不妨自達順御而超見絕韻因以付之翰墨足為一方
無窮之美觀也恭馬哀舊實與榮焉臨筆倍增跂頌

又

溧水縣丞李宥者和文都尉家賢子弟也和文樂義尚
賢天下學士大夫歸之其風流所暨至今凜然而宥不

獨有其家風又能悉心政事所可稱美幸托臨屬前有
改官狀四紙矣垂成之際一舉則其德倍于他日伏望
特達俯踐所請不勝企祝方此閑陋不當率爾為言其
如久荷眷遇亦以仰報也皇恐皇恐

與周漕

某惶恐上啟委質後塵雖不能旦暮師承然竊借光明
常如星日之下臨也不腆之役久益加冗故稍不獲
修記起居系詠拳拳當不待講而後諒冬候微暄不審

爾日尊履何如早期數月間獲依門仞荏苒不知所計
殆無以自名其況尚冀未遷召間猶及俯慰

又

某三月到此稍為完葺蝸陋以涉夏大病甫秋即入墳
山前旱後雨似物理特有以見制竟以工料不贍暫歸
以俟春暖間承按部經由每過必見問以至親屈大旆
臨顧蓬華所以加惠哀涼然常求比于古人而荅焉何
堪未易負荷高明一時人物得一望已為遭遇而委曲

賸存之意有加無已非今日之事也臨筆倍深依向

又

逼至節方自墳山歸恭聞大旆經過纔信宿失此叅近
重以為僅已而捧所隆教存拊踰厚紬繹增愧退揆畧
無可採而盛德禮意日隆定將何地可酬茲幸向風惻
然

又

伏蒙親寓別幅留貺朋樽飲君子之德而研味委意之

寵如奉欸席可勝欽戴又復超世翰墨文詞之盛璀璨
溢目一時榮遇未易形容也不敢別具公狀為謝深恃
異睠

與和州太守曾延之少監

某啟近遭專人通問上謝當免鈴下乍晴遂有春思隨
時抑揚想多勝趣系詠雅眷尤極繡綵爾日復不審尊
體動止何似鄙陋還家瀕一月愛民惜物之譽日有欽
向以葦門圭竇得之已如此則士論騰播組織于文字

語言間竊謂君相已在紬繹矣入奉禁嚴藻績世德是
乃一時之盛事也夙庇後塵彌用擊節

又

某到家即欲作書因冗瑣遂已淹晚前日方克展叙不
識果有以見亮已否游定父行欲申敬問適有少故輒
不暇及某家人回具言佳客憑陵連日醉笑竟使積陰
廓徹萬卉紛敷以成同樂之勝獨不得展轉末軌但深
引歎占高南望吾家山水實在樽俎間能復指顧俯及

哀舊而恨不得與之周旋否向風耿耿

與元祖慶法曹

名億

近聞行李之便謂得從容明爽展盡系吝往見不遇辱
顧相失晚節僅能一接語遽驚操袂殆若有以主之于
今不自已也既而遽圖修記道此不滿荏苒不契于是
疾病乘之幾成蹭蹬高義可懷要須冰雪可鑒未問與
時御宜以期絕詣蓋君子相忘于道術非咫尺低昂所
計也

又

某自到貶所即聞盛義秀粹樂易應接無一罅可指因
願奉從容仰借振采數因所往還以間舟車假道之際
久未我與可勝牢落異時投足治下私幸可以更僕承
教初則適有所未暇既而服食差爽稍謝通詣迄去僅
一識面追訟每日邑邑比捨策又復草草操袂然所得
度越所聞亦多矣晚節何堪定將邑邑終不滿抑遂充
足捆載以歸耶收之桑榆敢昧欣跂

又

某再啟相距纔百里地欽向既重自當接武申叙雖不能旦暮亦足資藉他日之好目前紛擾殆人情所不堪加之衰病因仍常若有以制之是宜取疏置遠而惠顧曲敦鼎來翰墨累幅展轉如奉懃懇揆非所據不知愧汗濡浹而景佩相先則君子之庭不肖之跡可保其尚在也更一月可以造請乃所願言糴糶不足以形容不審終踐所期已否

又

伏讀別紙具道尊府盛意并錄示行狀俾得紀次大門
遺軌紬繹反覆愧不能已早時才卿崇班以雅素之故
亦嘗見及衰退久廢筆研加之巨題豈敢輒當具以是
辭矣于是君子過予竟不許迴避雖已聞命然乍病起
忽忽未完更望少寬庶能牽課高文懿學自可表揚先
烈而乃問道于實行借聽于已蹟似是倒置皇悚皇悚

又

竊承受代非晚亦有意相遇佩服盛義豈所堪者八月
即在左右或前駕庶幾猶及迎展尚幸遷就無致相失
也跂向跂向

與龔平國

一水系望無異鄰牆投懷之懽實托舊物固當乘間就
展與接武交馳乃曠日持久才一通問其情固不如是
而表見所期渠得無所負耶念之殆不容少自寬而亦
覲雅眷有以亮之至于相悻勉謂糟粕之傳不可以廢

而加警焉庶幾翰墨間有一會面之慰也秋日曠爽伏
惟燕居優暇熟履清勝老日不異平時姑兀兀取給目
前以待盡耳尚冀摧頽或可支策遂有周旋披寫之幸
未間倍加保嗇苟可以寓之形容者無惜猥及

又

去歲蒙賜教尋具報比辱垂諭乃知今夏方到定將何
處濡滯然耶因是再枉紙筆累幅款盡如接更僕其為
感浣可量繾綣依田為生一水旱便覺費力不腆之託

二年沈沒今秋粗理又復暴漲可慮待哺嗷嗷不知所
以為策德門隨遇為生計亦如我之窘常日佳況少而
猥念多豈造化別有所命歟不然何特于我輩加甚也
古人未始以此自放帶經而鋤尚安知以彼輒易政須
吟哦妙悟叩牛角而為之節低徊稍休則寫之筆下豈
不綽綽然有餘裕哉焉蓋門下舊物也臨筆不覺縷
縷自餘非會晤不展

又

別後雖再修馳鄙懷曾未披寫姑為目前所牽制而然
要亦終何補於系念哉葛大川來聞為況稍詳細繹賜
書則情好有加而不已眷言欣慕早朝於歲晚者于是
彌厚重歎慕焉何以仰對老秋日來起居萬福大水彌
亘東南依山占高猶有幸免獨吾邦瀕為一大湖始則
微茫水末今更不知所涯際昔所謂滔天者其在是乎
徙家墳寺已幾一月來之不早衰病遂為陰濕氣憑陵
假假僅存視忽使不失故常則別是一種境界方其嘯

咏自適過從不乏頗復及此捨攘否霜候可期日念歸
壑蓋周旋勝踐實出素計要須還家乃克自浣大川忽
相顧山間粗得相溫回期甚迫而方病瘁加之翳晦不
我為地作書如在夢寐中所不到處與夫補敘失次庶
幾矜照亦恃大川必能詳盡也

姑溪居士前集卷二十二

欽定四庫全書

姑溪居士前集卷二十三

宋 李之儀 撰

手簡六

與龔平國

大川來如獲欸奉方爾詠思為慰可知自藏雲距采石
才二十餘里意念固不捨以是滋不能已但系累相仍
第一以老病故殆似非人力也陽泉早晚成行平日恨

不能周覽其勝異時賢主人表發又別是一段佳事將
為吾之別館矣彥發諸郎同之否歷陽不異鄉閭邑人
欣慕頗承樂趣較之陋邦何啻千萬里之遠老日所以
杜門却掃渠得已哉一出境便是樂國如獨力家務遽
脫不容暫何且以前者為計有至半年未嘗一通書未
論契好之厚于人情端有是乎因循苟且為患實大不
思不勉強誰之過庶幾收之桑榆而不知我者乃為好
爾左右還亮之否耶

又

前日自墳山歸不虞駛足遽去急于具問兼慮巢書恐遲又目前無可專委邂逅假托已而甚恐或沈浮得報雖幸遂而反愧倉猝不謹肅為有負也彥質况味果爾固不易遣得一氣更自能向安矣然巢君不可不延接其術似都不與平平者等試邀致任之字周士記其乃名醫也到即想見遠近赴之不輟且云向日黃縣丞請來太平州者乃是其人大川必留家而行廬江果有

効否盜賊充斥豈不防耶柳集荷挂念可以轉借及幸甚幸甚

又

咫尺不謂聲問疏隔如是亦家難多故一向不復自理屢欲渡江一見諸游舊今尚未果非徒無暇亦自無况來教遽臨伏審邇來起居佳勝邂逅三四遽督書而來介云不可少待倉猝為報殊愧減裂續當別馳附次

又

蒙寄佳篇讀之幾不能釋手別後勇進一至是自應超
然絕詣不作則已也便速酬報未及少須異日不愧續
貂知乘間必多佳製少日或得就覽編綴既嘗一齋則
九鼎之快可得已耶大川近病幾不可救今已無急質
中高雅但貧不醒奈何來貺已示之矣必自有書去也
又

葛大川在歷陽否如在可勸令歸自廬至無為一帶盜
賊蜂起單獨攜家徒納命爾且歸容有所處子厚集略

借并世說枕上遮眼可耳胡君至水退自可檢討即遣
還次

又

前日歸自先壠得墜刺乃承歸舟甚遽初不計許速悵
然不知其控信宿體况復何似一水旱時系望固勞得
見非及而正爾搶攘曾不得展意奉繾綣其懷詎可名
耶尊叔症候如何胡賢果盡心門下然不問以一言而
坐待巢君可喜今有書可一往迎之取道亦不遠匆匆

脩敘嗣當申致次

又

自改歲後無一日寧息厄會使然可量企仰舊於門下
不疏不圖頓爾阻絕自灘洲別後更無一點墨來似可
怪者其諸眷愛生理如何彥發位必同居子弟各已長
立任事否諸處田園既析各有所系仰計食口不少無
甚餘矣所諭婚姻事必侍郎位凡此尤當勉力也蹤跡
出入多在鄰邑或田畝間才有閒即就見

又

某惶恐妄作姑奉教爾豈足發揚高意但深塵浼之愧
過煩和諧尤不遑魚目換珠信不虛矣近著時望警策老
已無味且又比來多病家私多事未成定居每懷契厚
未嘗不作惡若歲暮遂成湯泉之行則徑可交馳自是
吾別館也不知仲永是遠近服紀既作大字便可作淘
米澗千客錢一老不足道也呵呵自是可頻上問但只
在此交馳貴彼此稍簡易而便至祝至祝

又

彌月雨如注營救不暇治若魚在鈎禽被弋求脫于萬
一者尚何及他哉然念君不少忘也忽被遣問承舟人
便道抑遂特來方時見及感佩尤不知其據雨復作體
履何似道絕安得一面謹先此問途他竚欸晤

又

大川來不惟得承履踐又得拭目佳句得我矜式殆非
小補審昆仲朝夕講貫于是甚惜不得投足後塵也此

事衆人方譚之非豪傑豈易特立欽跂彥本諸郎穎秀
不倫德門自應如是諸墳想不輟檢校不為水所及否
彥質竟失伉儷料不易處彥淵也有美除否當遂留京
師大川雖不久計暫失過從企向企向自此相望差近
便由采石增坊展轉似可朝還暮晚猶有待于來日不
審頗見亮否

與吳醫

一事僭易龔平國承務以其叔母彥質閨中也欲得左

右一過和州診視土醫固閱遍亦來太平就治不效竊
謂非高明不能起之和州距門下一宿之近必不難于
暫屈醫所以廣陰德而龔氏賢族切望不以有妨為阻
幸甚幸甚

與龔彥質

比間捨舟非特有慰瞻識周旋誨語實有得於桑榆不
謂舍館累日竟不得一接語再枉玉趾及復出見不能
飲焉此懷何以自控前日以先親諱日前期命舟即墳

壠飯僧經宿而後歸意謂終得少仰鄙素到家則聞已
歸繾綣弗類殆不知所負荷不審久要頗矜察否日來
體況復何似目前粗理徑圖面敘惓惓之深茲具其略

又

一見灑然徐輒自愧業已束裝而盛意幾成虛委不惟
忽忽不滿蓋欲輟行則不可遂操袂則非所安冒次搶
攘殆不知所為控晦叔處文字尤未敢就請實未有此
暇爾以一力周遍無窮事加之老日支離良自感歎比

欲精意作書亦爾掣肘少待則慮後時定應促膝乃克
詳諦

又

投分最欸所當旦暮而輒鉏鋤不契聲問不乏特人能
為我傳道者親炙之私要須不少間斷而譏評商確遠
圖向上為棲止斯其志也亦所欣慕爾繾綣此念不謂
得之而遽失之追訟牽制何以自贖別後又復幾日乃
就渡比到役次遂病幸免作浮爾逼節到家特為時享

與展掃墳墓邂逅雨不止家居不自安稍晴事竟又趨役次次第閱此月方克瞻叙申致已閣中差勝否胡醫雖云然不可不廣營治庀集君甚工今有書與平國一往迎之自含山半日可到而含山來城中一昔爾早時黃元明邀致取此途甚徑為人極有理本學者須善遇之也孫子實有子昔皆見之今官守何處

與榮天和

長至伏惟多享福慶往來累月皆不果通問忽忽易久

別來之思不暫已也邂逅公倩得所寄書蒙示錄感佩
無已農家作勞不謂老境方得之因勞知逸深恨已晚
也蚤晚少休遂歸首圖展近次

又

晚來體況佳適昨日荷垂碩為具疏簡非所以待吾老
友然晚日自是一種境界須得氣味同者乃能傾瀉況
的慙信厚昔所畏仰者哉既忘其儀物之不至又辱盡
量滿引至不可勉而止其為感佩可勝言耶方圖旦謝

專介被問一一欽領早暮得暇無吝下訪介還草草

又

霜暄伏惟起居佳勝久不獲款近企仰為勞頗為猥冗
櫻拂致疏通問方竊自愧辱手示并枉佳句讀之聳然
高絕固以欽畏而思道舊相博約是真相知更得老先
生表發敦勉為其攸助定在華顯矣感歎無喻不腆朝
夕再當暫出十月未歸庶幾展盡

又

多日不展奉不忘瞻跂雨涼伏惟起居佳勝辱手示感
佩無已連綿事緒殆不容撥遣甚欲稍從容竟爾相妨
良自愧歎碑刻荷珍示俟見思道問仔細然衰退豈能
自託於勝游之末但深慚負爾

又

多日不相問竊知口瘡作梗別無甚苦否雨不止而終
未霑足不審體氣何似欲相招聚話少時又恐未能常
食甚跂渴也兼知新居完潔必稱雅懷朝夕馳詣次


又

大暑伏惟起居佳勝近辱令似垂顧後數日方知即到
壽寧探候已落晚復牽迫不果一見甚眷眷也比來聲
問頓疏殊以為懷一二日暫出二十日左右可歸亦當
面敘乃行也欽企欽企

與劉延仲

雨甚為況何似異地得相邂逅固為希有之事而適此
相妨極不滿意也少間食罷專遣人奉迎次有所幹委

千萬不外



姑溪居士前集卷二十三

欽定四庫全書

集部

姑溪居士前集卷二十四至二十九

詳校官庶吉士臣吳烜

侍讀臣孫球覆勘

總校官編修臣王燕緒

校對官編修臣吳舒帷

謄錄監生臣李德

欽定四庫全書

姑溪居士前集卷二十四

宋 李之儀 撰

手簡七

與榮天和

前日忽遽問途不得已就別暑中奔馳勞倦殊不知其
況然頗有山水登覽之勝隨地樽酒之適極奉思也昨
晚還家骨肉輩首及動靜伏承日來體力佳健病倦未

能接人事未果上謁庶幾見亮比得劉孝嗣書委曲久
不見其人得書如與之款款崎磊落尤使人歎想不已
有間便當致報幸相及也吳師道到京必多日得書否
不一不一

又

初寒伏惟起居佳勝日者到家才二十日竟未得一相
見搶攘叢委殆不容應接雖嘗通問然不敏之愧無以
自控村落間別是一種意味忽忽幾不欲捨之而去豈

鹿豕之遊天所賦耶無由屈致晤語但深悵結

又

素不習田畝間事既來頗覺有味似是本來境界亦不自知其然也霜降風冷歲物崢嶸又將一年矣老人貪生尤以為懼爾食貧不易枝梧有求必應固不可忽高介不與流俗拘豈亦知非人所及啜菽飲水當取以為樂而不厭前世孟東野賈闌仙輩蓋亦如之推而上之信所樂非窮通也

又

師道向借去兩畫像已取其一東坡老欲煩天和為取之
千萬留意恐其偶不記見還爾本欲作渠書為此事又
恐已來竊意天和居第不相遠可以必得雖其不在亦
可取如取得且留天和處候不肖歸見及專奉托幸挂
念

又

早寒伏惟起居佳勝前日登門輒留刺擾擾不自給未

能從容相款極不滿意也辱手示欽佩眷厚作字素非
所工又多事之際恐累佳紙姑俟旦夕投隙尚幸應命
淹晚至愧介還方起枕草率滋畏不一

又

霜寒伏惟起居佳勝累辱垂顧牽迫未果修謝愧詠不
展蒙手示具領厚意疏文極工必有副本姑留為矜式
苟不屑行當展翰之早晚上謁

又

金匱要略卷二十四
累承垂顧至感日復一日竟未得卜一勝處為終日之
會未始忘懷也蒙問並疏軸失契勘作字輒大更爾奉
煩皇恐皇恐謹復上納甚愧有玷高文也得暇祇謁

又

多日不接語每見吳師道即問動靜寒色伏惟為況佳
適示諭媿感初亦未知也少年膺此重任能盡瘁體國
則親黨與榮焉疇昔固可觀也幾日有太平之行前此
略相顧幸甚

與劉延仲

某啓大雨蒸濕伏惟起居佳勝累欲煩公作包釣魚煮
江南羹為一日語笑病齒大瀉已而道絕不可出信佳
事為不易得也昨日領手帖存問周至感激無已穎昌
已有報得勅辭罷便行聞公使短未竟果了可來作同
官否乳泉賦等諸文並望付來介閱畢即馳還正本或
不在即所傳者尤佳不敢留多日也路通上謁次企渴
企渴

又

大暑伏惟侍奉起居萬福久不奉周旋傾思固不能遣
東歸屢款禪林已而稍接巨載兄弟且獲與誠父一往
還獨達君子念之常不自得然西來相知道雍容湖山
間真風塵外人矣想像佳句倍深耿耿比得疾淹久衰
晚殆支持不能惟僅脫死耳外事廢阻殊不聞舟御已
到先枉手筆佩荷慰懌可量鄙陋氣劣多寫字未得累
年願見之懷且非尺牘可具也敬俟上謁

又

比登門不獲見累日方欲繼之特未暇也示問甚寵感
刻乍晴侍奉佳勝亂道上還一二日再奉見次

又

比幸經由不得奉款晤少別豈勝繫仰霜晴為況如何
佳期定何日無由進與席末但深傾向庶幾回轅獲遂
相盡

又

風埃伏惟起居佳勝到此日欲展近牽迫殆不容出頭
初不謂至是也瞻企拳拳可勝道哉蒙手示具領勤厚
三二日當前詣才歸草率至愧

又

早來欲詣見偶為賓客留連比到一二處不覺侵晚密
邇阻鄙豈勝拳拳夜歸辱手筆恭審侍奉起居佳勝約
食固佩勤厚屬二十七歲行尚有不得已人事勢須略
遍輟身不得遂失臨寵之意愧恨可知旦夕當幸承晤

燈下草率至悚

又

早來客在門起又差晚索書擁至勤來使極減裂慚負
可勝言耶少間不審起居何似佳楮固已過厚二缶緘
紙極精但未知包藏如何耳一笑一笑家通或未寫得
略告援去分少間便歸納次尊公不敢率易上啓望侍
次申敬

又

風埃承為貺甚佳極慰瞻企蒙問愧荷便欲祇遣而客
來不已殆未能輟身良眷眷也馬復自早出矣少間暫
遣所表代步到左右如何參寥聰師並煩申叙甚欲相
見能少留見待否

與劉君秉

拜別易得歲月雖東西相望然超世之韻常在眉睫間
兩附遞上記一次捧教筆自到京一向藏縮遂不復與
四方親舊講好然薄從東位諸君與承動靜晚又得文

思子舍尤為詳盡正初迄今日幸迎謁不謂遲回如此
比得寒疾四十餘日都不聞外事忽披翰墨恍若夢寐
相接其為慰浣可勝眷眷大暑恭審捨舟即安尊履佳
豫區區因劣兩日來方作字成勉強具報纔出首當上
謁次

又

連日出城入夜方到家雨溽蒸熱徑就卧欲見既未能
自慰而執筆之間亦復不果雖致問展叙因茲不逮蒙

手筆敬審尊體動止萬福昨夜拜賜已二鼓後不時具
謝悚悚一二日圖奉欸晤次欽跂欽跂

與趙仲強兄弟

某啓蒸溽意況從而不佳瞻思之勤滋不能已不審體
况復何似君求又有書附問今以小紙奉呈如聞朝夕
過巨載家庶幾獲逢欸晤餘遲相見具道

又

累日不聞動靜馳仰無喻晴色漸融恭惟尊履萬福辱

問勤懇欽佩寵眷而辭藻爛然尤畏不可及也投間修敬門下入夜布叙草略皇恐

又

久不交馳方劇傾仰夢寐屢投可見於公厚薄也方作書欲浼左右忽叨翰墨敦諭稠重可勝欣感兼知己赴朝謁飲食起居如常日喜慰尤不能已然更宜過常持攝無忘前日之灼艾用醫也不罪潛言區區本圖此月一到京雨不止道路如江河勢須少待骨肉輩未來獨

處不無牢落頗亦見念否一笑一笑

又

日欲望門遽有行色遂成鉏鋤然二十七日猶幸一見
而中途雨大作乃已累日尊履復何似區區最荷垂恤
既不得旦暮親近為不足於是又不得面別黯然其何
能已九月十月之交沿檄到京首圖展奉次餘惟千萬
加愛依戀依戀

又

間邑山和尚背子段一枚僭易上獻仲強絕韻資仕而
又文采足以相輝聊托雅好尚有緒餘偶索之未到才
至即附便次

又

比以東坡即世諸況不佳十許日來方有生意書問稀
阻端為此也然別來三月三夢追逐豈非高義相予之
厚有以致之不然別自有入見念故如此又恐只是自
家妄想也一笑一笑仲南往京少味捨公誰與周旋者

幸時溫之不妨投懽赴醉之際瀝酒見向比官迎新送
舊外方小官况味甚惡未暇周悉續當別上問次瞻企
瞻企

又

仲强大慰必相見稍疎閒忙有間故應如是本欲作書
兄甚未及極思渴亦作得數詩錄寄不暇矣容後信也
江外酒如醺灰計勉強濡唇必暴下如注老來恐一飲
便脫可無念乎向才得一罇似減正潤風采一笑

又

比以親舊往來南北多至郊外留連稍阻叅問亦苦乏
人通記瞻企風義鄙心不間毫髮方圖早晚脩敬澤之
見過特荷存恤既非區區所素但皇恐不自勝而高明
或未亮者是將據我於爐炭之上也氣候蒸濕恭審清
晨尊履佳裕一二日徑造門第所懷當候躬致

姑溪居士前集卷二十四

欽定四庫全書

姑溪居士前集卷二十五

宋 李之儀 撰

手簡八

與趙仲強兄弟

小詩特為戲耳牽聯為用自是無可作做搜索往還豈有他也元確兄弟曲相符同此正是措大家常茶飯過蒙留念慙悚不勝所以得罪左右但日欲登門而未及

併俟旦夕負荊次

又

月餘不奉款席思仰未始置懷抱氣候不定尊履當復
何似比苦脾疾極無聊加之親舊問病者相繼勢須且
徧省視故輟身不得深幸有以見亮也新庭必已歸後
圃陰合池面荷已離水圖書環遶筆墨吟獻參次而會
又復絕世獨立相與抑揚勝致方是時天下豈能彷彿
藩籬高明亦豈知有天下事耶欽跂欽跂尚阻周旋不

勝向往之深謹具上問

又

季秋霜冷恭惟台候萬福雍容朝路孰不腰金佩玉煌煌交映然文章足以表見議論足以稽考蔚為本支典刑而士大夫想望願親近而不可得則捨高明數公復何人哉流俗何堪幾三十年為河間賓客矣詠懷疇昔恨無術可以縮地尚覬聞望愈隆建旄分社永為帝室

賢輔

又

相別不覺許久書問曠三二年才一講初意門下之迹
已掃不謂記錄不替毫髮而書來疊疊有加風義久不
傳于世枯卉可復再榮惟風義不衰則乃有向榮之望
固知盛德所鍾亦自愧不振一至是爾高文麗句頃獲
成誦別後不得一歷眼是不足訓耶抑因循所玩也衰
於或未見棄時丐筆吏傳為吳鄉警策實假寵於我為
重狂狷或時有之私居乏筆力未果求教徐圖上免園

亭之勝幸一一疏示所因或得附名詠歌之後豈非至願

又

荒莽流擯終乃几案間一物不謂一別便爾懸阻窮荒
衰陋無聞見無商確無圖籍可考凡木枯株但未死耳
每懷從仲康仲強談笑緒餘之末劇飲狂笑間形吟賦
初不計尚得生今日緬懷一夢可勝感歎越寄缺甃間
但以目前為遣免異時縱得再奉餘亦無頃昔人矣向

風幾至酸鼻

又

薛夫人尊候萬福後來更有幾明珠平日嘗獲瞻望者
計獨蒙不棄青氈異時樂院想多列屋而閒居但見師
道子椿諸君云絲竹未嘗少輟德美才秀而福與之俱
可只尺輕有所彷彿哉子舍必多在官守令弟想各進
擢矣令壻學士恨未參識書局料不能久仲惇諸姪當

已出仕

又

衰莫淪落如在井中奄奄未絕時於缺甃間望見青天
白日心知其然而無一援之而出者故一得賜書未嘗
不感慨梗塞期尺索於可援而杳無與應終歸之於造
物亦未能果爾一決也歲云莫矣其懷抱可知比辱師
道處脚力所傳手筆博諭疊疊固已不勝負荷而師道
子椿書中具道周旋記錄誠義有加而不已反覆翰墨
紬繹二君之傳但愕眙宛轉無地自控惟改易昔人詩

語以寫其憂云安得兩黃鵠攜之置其傍暑候已深日
來復不審台候起居何似不腆之於門下殆非苟然者
十年漂泊親戚朋友號疇昔之厚者或近在咫尺或便
道吾廬尺紙之不通與來略叙寒溫既見而不情之語
如湧至掉臂而不顧者往往而然獨吾仲強瑩如冰玉
無一瑕可指而凜凜見圖如一片天成地貢以表表稽
之物理未易形容似是佛語所謂百千萬億劫相因以
至是也感激之深筆次不覺縷縷何時一奉促膝之款

向往滋劇

又

清暑伏惟起居佳勝到此主於一拜見既不得從容遂
計餘日獲盡鄙意昨日已具馬將北去遽報東坡喪舟
來亟往郊外致奠愴猝不即為問似於豫約鉏鋤極不
愜所願也只今且歸無緣再款門第欲為繫戀若不容
自控到潁昌時得申致次欽詠欽詠

又

經宿恭惟尊候萬福少別思詠不暫忘於是得奉頃刻
固已甚慰而未獲傾盡尤不能已方圖脩記遽枉手筆
敦叙稠重感服無已朝夕再當祇造百冗具報草略皇
悚欽跂欽跂

又

去冬了葬事今年三月遂徙家太平早時欲隨援而出
今復再墜豈造物者終使矚矚於此無復可出之期耶
抑困之至極而訖有以副其必援也所冀無他姑欲一

至國門與平日所厚如吾仲強一二人傾倒數十日遂
別此生爾悵然未得之間可量繾綣方時炎酷拂雲之
檣皆有超世之趣歌舞醉笑之餘自倣於垂世立教興
亡治亂吟風詠月抑揚頓挫之際為河間東平所以為
樂則盡矣至於平臺賦就而鄒陽枚乘蕭颯偃僂欲進
而不可得則不審尚能嘆息以期之已否三月末纔捨
舟便為暴下所乘淹延四五十日至灼艾方小康今猶
目昏耳重不知所以為況故作書意不聯屬時有修改

處高明姑領其勤可也欽跂欽跂

與儲子椿

雨不止小居岑寂尤渴奉警策既難暫遠又不敢坐致
車馬可勝欽繫忽辱手示伏審乍冷侍奉起居佳勝今
日本欲入城以分付少幹未有人可托勢須一二日間
可遂瞻奉山陽遷改日過又凡百萃在一身念之如在
風浪中不知果能到岸已否良可懼也

又

節前奉專人賜教累紙稠重所以見求之義有加疇昔
方時與金陵諸老作緣欲作報不暇及展轉千許日纔
了此一段勝事以故留連鄙誠似已緩矣當在深照踰
月不雪氣候如初春多作上壅咳唾痞啞赤目諸恙老
境極不自得不審履況當復何似傾馳歎悉甚於茲時
如欲插羽翰凌汗漫超出於形骸之外而不可得其所
以疊疊於高明者可勝況哉歲晚牢落江山滿前促膝
握手歷叙前人經行之舊可慕可慕遂將延挹相安得

亟逢此朔風倍增款慰

又

新陽固當一舉酒為君子之慶咫尺不逮我勞如何里
開正以茲時為勝遇盡醉過從輒交歲無虛日不審能
有此樂事否客寓無一如所念者姑杜門與佛乘作佳
好要是窮途究竟如是爾每想像物我亟欲即之常居
有以繫之亦意投懷深盡或有得處於我不間一毫髮
也未間時幸寄聲俯慰展轉之懷

又

睽奉忽忽踰月日有馳懷霜秋比想履中佳勝損書累
幅良愧見厚之意封吟非遠時聽聲聞為慰也餘惟事
外自將復謝疎略

又

少別瞻思不展到此首幸款奉然兩路牽率玉趾極不
遑昨日又煩迂顧雖投分置此形迹其如仰懷未易堪
也方得紙筆作謝小童又出簡誨寓意太重遂欲據我

於爐炭之上耶皇悚皇悚晚來承動履清勝入城方得
就見拳拳之深當候面奉

又

高文讀之聳然豈出於誠意故爾條暢似是抑鬱既伸
詞源自然澎湃也欽歎而已某已令謄寫錯了又改故
差遲爾更有一端須相見熟議副本謹已什襲

又

自當塗歸初不得一食頃休息長倩之所目擊也所幸

形跡相忘故得以仰依誠照其如踈略一向不無可罪
亦庶幾有以自遣加之風波益可畏舉動來於不測本
圖歸保故棲因而卜一作壘處今又鉏鋤不免聽其去
來姑了一日為一日計爾稟賦不厚投老境界乃如此
可嘆可嘆長倩美才既脫非橫當益刻礪進修率履古
人不到之地是交遊之所懇測不妨屏他事粗進飣粥
以激志操仕宦固可指日為期要當自我知得為佳矢
於報效知已是亦為報奚其為為報哉千萬深亮無以

語直見罪

又

二月更欲再過當塗逐日事如蠶作繭愈練愈縛更須入湯乃脫其何以堪耶故爾濡滯悶損悶損家居况味如何七日不舉箸十年不製衣亦恐未為貧爾一笑一笑他須款致

又

近連奉書稠重累紙感佩無以為况伏審曲肱樂道與

時御宜慰忤何已老倦疲於應接數次假於欲還莊居
因得展叙尚為事奪瞻跼瞻跼於是特在專誨疊疊見
屬深畏不忘之寵自非誠義相求終當寓於可托之地
何以如此恭焉不類但劇負荷止候一二事免即圖造
請纔稅鞅便造人咨候矣

姑溪居士前集卷二十五

欽定四庫全書

姑溪居士前集卷二十六

宋 李之儀 撰

手簡九

與儲子椿

相別遽將七年初謂即在華要歲闌尚爾得非固為靜
退耶重於一時耶欽跂欽跂桂玉淹回自亦難處定復
何可以補外都城住久無適不宜外官豈易彷彿特俸

雖厚亦不知其為是乃不易酬對者更希裕處期之必達而已衰悴旦暮人爾杳未有會晤之涯臨筆倍增依黯萬一得再相見實所翹跂

又

伏蒙別紙該貫彌識冰玉但密邇玉色常聞天上語晚日豈不彈冠特如老病不調何宣城田例不復完良可惜但無唱之者守令方時皆開爽通氣類似自棄之爾重祿固難常有產則能常頗思之熟否思永吉歸甚促

殊不逮意續別上記次

又

昨日獲奉厚眷兀至抵暮從容緒言一一皆可人意而
置食精潔備盡勤款超然遠思頓還舊觀盖到此未始
有此況也其為感慰可勝道哉晚歸南寺已失玉趾似
是無投足地故不及相待甚不遑祇極快悵方圖上記
遽被翰墨并佳闋清詩詞度前人韻至押到老鈍遂當
絕筆珍佩何已適為南僧約素飯飯後或蒙迂步何幸

如之然未敢必也

又

前日承見顧稍此阻濶遂獲周旋感激不能無所慰也
偶腹疾作不果款留至念之示問尤佩懃懇洞庭春色
詩畫在監酒趙供奉處可託少孫就取此已無淨本而
游郭諸篇亦不曾留次第趙君卷中皆有或得少屈佳
思共成勝事不為小補旦夕上謁

又

時序摧感加之雨又溽不解老病相乘殊不知所遣免
忽披手字並貺和篇隱然振起尤愧前日之妄作也媿
佩無已伏審日來起居佳勝倍慰瞻企賜來輒私有之
將時出吟諷以代良藥不免牽強筆墨別錄以致元發遂
寄禹欽也路通首當上謁次坐客草略皇恐皇恐

又

昨日承教甚新警慰多矣早來起居何似濕熱意味尤
不佳玉趾所投庶幾意諭北觀能不憚遠否不爾當尋

故步懶作字不果及元載元發明叔望就約也

又

昨日欲候門下竟夜起不得遂阻展近乃知老境如是甚可歎也既審侍奉增慶辱手示並和篇咄咄見逼太甚東坡嘗謂如我輩不勞逼而歐陽文忠公之和詩本是襲人後而聖俞每度越十步外何耶於是何止十步盖千萬里之遠矣因墀得玉又獲珍藏之盛感刻感刻少頃欲得就見宿惡未殄脩報極草略皇恐皇恐

又

日者具問至略亦謂事稍閒可以巨細申叙中春後幼稚輩例作塞壅無一日不用醫加之舟居不便無復佳況遂成蹭蹬每以為念也故人来備聞履踐之勝慰仰可知浮沈閭巷人不我貴久矣然改觀生敬浸尋以至於建旗壇上而一軍皆驚則擁篲負弩可指日而見欽向無已家事漸宜區處有歸熟處便是迷境不可不豫制也咫尺尚阻面致糟粕之傳徒有愧於忉怛爾

又

伏蒙就示長箋為禮甚重滋畏綿薄之難堪也紬繹營
緝當於天聖已前景德而後求與先後者盛矣盖八十
餘年不復見此作矣頗欲俛俛追逐此特無異爝火之
於正午之日但復熟成誦永為矜式欽嘆不足道也就
聞遷正學職雖於表發廓勵為可喜然薄有簡書之畏
得無拘掇應對稍勞否不腆敝役更十許日即去此續
食西引不在淮上即於國門迎見千萬以時加愛前揖

光大傾跂

又

涉春擾擾目前畢竟不知何事故作書不果欲一見館
下復不果蹭蹬端可愧也而豈弟敦篤樂義而無求蓋
未嘗一日不在念也漸暄日來體力何似雨不止終日
頑坐求一投足地猶豫之久卒致迤邐自是老年境界
如此且亦牽率便然以故相與搜寫傾盡尤不能已方
且圖之未間倍希珍嗇撥冗修附殊不盡意

又

忝恩叙復方俟少間作書為附不謂專委在門連幅璀璨非止佩服重意其警惕於我亦多矣至於延譽過情滋畏非據來使不欲輒留正紛擾中附報不及想蒙加亮日漸長雨不作乘興門庭當使家老失聲於驟到亦一段佳事也如何

又

流落中君子周旋常謂隔遠不能旦暮追逐以投講貫

之樂習閑易隨心雖不忘而力輒不契奈得已且已何至是惟可付之形迹之外爾春暖或乘興一到館下亦未定屢尋此味祇恐纔到不免紛紛遂中輟更俟紬繹豫求一可逃避處然後問道注意吾友更希為我熟計之

又

新正已附見賀意不覺又添一歲畢竟成得何事這下入那下出良可歎息惟少年節物爭新別有一種爭勝

難以語此爾一笑一笑撰述此來必多不蒙開錦何耶
年來都不曾道得一句好言語源淺固易涸自是終不復
津矣可勝悵然

又

塊坐已如木石雖往來太平不乏每到未嘗不歎息君
子之不我俱也京師久住意況可樂處多聞見所博固
不在言而脚頭所到便可卒歲其如一時勝流如仲強
之好客聞復之多聞師道之勇於為善津正雖未相識

而其人待見覆而知引詠高躅可勝欽仰

又

太夫人貴眷暨諸鳳雛常聞動靜甚安必時有書至左右子全到必相見生事日進其術業則不待形容師道今次大禮必命官且得了當不晚定作問職曾為之一佳夢似兆茲事作詩尤工今更殷摯知一向寧處故鄉未必可樂也仲強書來每欽歎高躅不已斯人不易得也頻相見否其學必富其家必愈非前比拆候書便

作附上次第已作太平之行而此更甚迫適相妨爾非
懈怠也子蒼未相識聞風甚久太初况味如何聞復在
甚處居皆欲作書偶未暇向蒙寄示數詩輒和得在師
道書中可取發一笑年來無復好意所向多敗人美况
者不知再居太平後將如何爾所得葬地在藏雲寺邊
已用今冬舉事恨子椿不一見也終為太平人豈人力
所能致哉其如文物極盛之際獨留滯以老豈非命耶
惟公等次第而進與自得無異尚冀事功表發時容一

擊節稱頌爾

又

晚來起居佳勝久別遽爾瞻拂無異自天而下老倦衰
病之餘所以警慰亦多矣逼行未暇從容請叩不能無
邑邑伏辱手示感浣無已信物並領單騎陸行乃能周
旋如此但有悚愧冠梳之惠尤出厚意俟歸專達別圖
上謝次藏雲地須至奉浼玉趾非細事也得一言乃定
爾千萬以存沒為念不可以已成為間果可用就求一

圖於分明將寄女兄蓋方時利害所同獨此兄爾林甥
其次也纔到家即具問忙甚不及展盡

又

別來兩附書一采石一范尉想已呈徹久別幸見而曾
未得少慰展叙可量眷眷方暑不審日來侍奉起居何
似乍歸冗甚加之病倦不貸艱於應接以勞思佚翻愧
驟遽為不易堪也一動又是一事身雖寄此而念常縈
縈左右未能隨遇即安執筆汗下

又

三有書方謂並不見答茲必山水有可疑者忽披手示慰
感無已漸熱伏審日來起居佳勝乍歸應接必甚冗已
將閱月當就緒矣既不用入學自省一半事只是京師
一頭項却須經意恐放不下則家食不能安也治生進
取明是兩途且耕且戰特虛語耳想久在思慮老倦比
來益窘灼之數百壯猶未見功次第發過我有驗漸謀
遷居舟則已備多日矣思奉周旋以日為歲未間尤幸

寄聲

又

霜寒伏惟侍奉起居佳勝一別五十日道路離勞每想
像友愛以慰逆旅到此已信宿而奔走所事力不逮意
故交遊間未果申致遽叨翰墨拊諭周悉欽諭至春可
量繾綣只今遷靈樞上岸明日入山勢須事畢乃果瞻
叩方時非遠適所宜尤當自愛千萬不須見臨也固願
從容展接於是似未可如所私吝也傾企傾企

又

太夫人尊體萬福荊釵輒附起居上都風物似非人間
世不知板輿肯遠邇否

又

稍還秋暑為况何似前日遶遭講鼓所逐定於字說無
緣良可愧也兩日偵候出沐皆云且寓學中人云在宋
家方養源時不敢於見蓋吾曹每聚首必歡呼傾倒不
無汨亂美意要稍踈遠為佳方圖申叙蒙手示感服不

已定時何地可以奉周旋恐須過試也二楊已上莊收
刈端坐極牢落

又

流落江湖遂與魚鳥相浮沈以老而不知歲月之遷轉
平日交遊恍如夢寐間得之亦不復相期於顯晦存亡
之際况鳶鴻高舉秀特超邁如吾兄等輩者耶引詠疇
昔雖不暫忘然聲問無從可致不圖記錄特先翰墨之
寵申味雅春略無一毫髮低昂歲暮何堪益信金石之

不渝也感佩紬繹未易為據冬候苦寒不審邇日台用
起居何似杳未有瞻望之日執筆倍深推哽

與友人

正居運判屯田節下稍不獲瞻近村居隨所役不能無
事候間不講遂爾蹭蹬而高明之地亦或有嫌於僭易
也麥雨不止氣候如臘中恭惟行臺豐豫慶侍萬福繫望
來音日覲再款促膝臨筆可量眷眷

又

通判朝奉座下屬心盛義我方西而君子遽東若故相迴
避者以鄙念不捨則今日從容忝奉喜慰可知驟爾異
地繫各尤不能已寒日益加不審履況復何似舟車之
衝圓方小大理難脗合而乃稱頌贊仰如出一口末路
何堪但擊節之不暇信乎高才博器有以得之也欽遲
顯擢俯契瞻溯

又

別後累欲作書所寓隨分牽迫不能自裕到日已數日

愈覺窘蹙其如相得雖晚而相期之意甚厚不應在衆人之末也比已出閨風稍順即渡江荒僻無異逃空虛者蹙然之喜定將何日見投但濶步可期門庭日益峻矣魚鳥廝友遂終不得一見邪亦或有邂逅之幸已否興言至此倍深依悵更冀調護順適以符念向

又

一面歡若平生加箋致勤以失於不豫計方在宿醒卒不獲少饗珍潔而厚意之隆則欽刻深矣方時坐間多

可喜事媿無一語以叙勝遇庶幾他日周旋猶能披寫
追錄相為掀髯一笑也

又

酈延之別三十年矣一時人物顯晦存亡炳然如昨日
事眷言笑語自當超出時譽為朝廷立不世之功紹續
元昆俛循弊筭之微實借風於里舍摧頽姑日復一日
苟玩時景勢地相懸絕定應未死之日猶及瞻望已否
姑溪居士前集卷二十六

欽定四庫全書

姑溪居士前集卷二十七

宋 李之儀 撰

手簡十

與趙德麟

伏審藝學昭顯恩命殊特聳動宗藩超映士類素叨厚
眷聞報不勝欣跂聖上雍睦族好敦尚風教以粹美明
博之儲適契甚盛之際定應建旄樹纛疏恩大國使河

間東平不獨見稱于前世也尚冀老境未衰得從執筆者之後歌詠休明鋪寫偉觀臨紙不深馳仰

又

漂泊江山望中朝人物如在星斗間可見而不可親每自嘆其淪落而未能遽忘疇昔之念也吳師道歸忽奉手教博諭勤懇如接款晤恭審朝謁之暇上體異眷讀書為文日有勝趣台候起居萬福感佩不忘滋劇慰浣於是老矣特與公結一報身之緣耳安知異時不復再

有相值之幸更蘄深討不倦忠義自許周旋寵數百歲
高顯佛會中庶幾一笑相屬

與彭丞

先人為門下客衰晚獲拜恩地荷先公委曲延挹別後
屢欲再尋末軌而僂僂一力殆不知日月之行而鄙意
不能自遠也於是遽聞巨創適以營奉阡隴走山陽改
舊即斷用去年三分之二在道路與督役山間欲暫輟
以赴所哭之位竟不暇及亦不謂遂畢大事矯首愧忤

幾不知所控訴方圖收之桑榆不謂略其所可責而察其所不逮敷諭稠重伏讀汗下稍間庶幾不失素期執筆倍深摧哽

又

自去年正月得卜一向往來金陵當塗以理其務凡目前可應者之外略不及毫髮此特綿弱無助所致而不當於門下今日之事輒緩咄咄不敏知借面之無從爾曲蒙見素挽詞乃知并容尚可搜求胸中以見也然牽

課終不能工姑不敢不如來命爾愧慙愧慙

與孫知縣希魯

到此如歸鄉里一番應接殆不容少休兩辱寵臨尚未
果再詣門下鄙心固不自安然亦幸有以見亮也向晚
恭惟起居佳勝偶昨日飲酒過多醒思支持不得特荷
遣誨尋失具謝慙悚滋甚少頃上謁不勝拳拳

又

往來亦屢矣尚未得一詣館下於是方欲事間稍慰鄙

念首辱遣問繼聞枉顧感佩繾綣尤知盛意為難堪也
日來履况復何似比以所事未就緒未欲入城更數日
乃克申致蹭蹬固非得已想蒙深亮

又

微服到此初不計許久然不敢輒通問日來伏惟起居
佳勝不圖惠顧特先翰墨欽諭不忘感服何已無衣冠
以見門下但深傾溯

又

雨潄伏惟起居佳勝尤以齒頰乘間憤恚未伸密阻瞻承不忘傾溯適聞督獄九江戒行有日度還轅猶在一月後而北歸之期近在旦暮恐不獲少待仰奉緒餘可量依邑今遠千萬加愛俟息肩別圖上問

又

為別易久蹭蹬不果具書日來伏惟動履佳勝忽披手示仰佩不忘因循修報後時汨沒目前事不覺荏苒想未訝也咫尺未即瞻承倍希加愛

又

與君略同里閭於過從瀕四十年異鄉流落得遂相見
為喜亦既從容官守固無以累故人然常情所吝者可
勝道哉非意乘之幾成秦人視越人肥瘠而彼善於此
有之矣方時亦足為高義也老日尚可激昂庶幾倦途
猶能束胸以見臨筆姑奉一笑

又

久不通問伏惟動履清勝莊居咫尺門仞既不入州中

遂不得一瞻見傾向固無已也初計野外可以苟閒少
日比益紛擾殊不知其況為時所棄固無恨而私害亦
倍費力豈艱生不容少貸而然耶可歎可歎尚冀投間
或奉一面

又

霜冷伏惟動履清勝往來治下忽忽累月但日與田夫
樵老相與低徊盎然不知身世之為累則仁者不擾之
政何以上之數欲一見面贊其然竟爾未暇可量傾屬

來問猥及欽佩至意事固有不得已者無間巨細亦知恤隱有加乃爾僭冒無他冀姑借威明以牽其來蓋私力已竭矣可媿可笑他佇異時請叩

與成德餘

薄有人事之窘未奉起居伏惟侍奉萬福辱簡誨惠繪

闕

備仰精製感歎不已其如窮日力以盡巧思良未

易當也什物且留續令持納次餘俟旦夕占謝

又

相違易久早時不得一具書固非懈怠特忽忽不少暇
爾眷言俛求之義鄙懷其可忘耶於是再奉手筆所以
相與之意甚數佩服至情可勝繾綣秋晚日來體况復
何如相望咫尺欲見杳未有期庶幾音驛之便時叩深
密兩日風雨作寒千萬以時增衛瞻跂瞻跂

又

相別幾一年來雖望第才百餘里於是方款交馳既竊
自幸墮緒復振亦甚愧不逮也來貺懃懃尤佩深厚伏

審秋晚漸寒日來起居佳勝故都搖落之餘高低遠近
種種皆飽足人意但恐厭飫習熟不復知難得為有負
耳何時追逐笑詠以極登覽之勝遡風可量眷眷

又

累欲作書蹭蹬不果勝義難忘常在傾屬所示書幅諄
厚如奉周旋伏審涉冬以來體力佳健感佩愧仰可勝
鄙陋一報緣中種種皆是虛假一毫髮低昂六鑒便不
得休息且如德餘美才好義乃俛首人後綴綴恐有所

不逮則彼所以窘我者定將何以高之興言至此但有
歎息而惟知為虛假乃所以無入而不自得也何時叅
承倍深耿耿

又

至節不敢修敬勤祝過煩敦諭慙負何已前履新正盛
義感格對時交慶亦別當展叙次衰晚於一報緣無幾
雖得君子於末路要是白首所期者不能旦莫周盡可
勝喟詠適有少冗作記不究所懷行圖後便次

又

比奉累書方知前日蹭蹬為可恨至於美詞妙翰資藉相予之意則恨相得之晚古人所以深歎而不已者益信其有味也日用有餘更當展轉紬繹以極超詣他時將聽額望不及豈敢輒恨於世習而已自此當不乏交馳介還遽索不能盡千萬加愛

又

日者速欲具謝作書極草略方圖繼之以訟不敏隨分

日前益撥益窘遂爾淹晚專委遽及愧佩眷勤滋負踣
蹬為可責也冬深苦寒體况當復何似屏居意味無異
一日風霜翳路只得畫灰食火以寄餘息前所謂窘者
亦瀕於強勉耳早晚一笑周旋未間時寓音繹似不乏
於糟粕之得也如何如何只赤窮臘倍希保衛

又

元章跋尾過承錄示至荷至荷必多得其字蓋數百年
無此作矣真可寶也鄙陋出於一時盛意所臨故輒狂

妄尚何足紀錄悚息悚息

又

比蒙手示乃在區區所負之前欽認眷勤可勝傾邇方
時故都盛麗想時有登覽追隨之適但以饜飫朝夕不
以難得為有恨也貶所徧陋略無與意等者但愧處邑
邑而已頗見懷否

又

頃蒙詔恩首被翰墨為禮勤縉欲作報非精意不能少

展也而將一過故都庶幾促膝可以布叙荏苒不契遂
滋淹晚愧負常若有所失方且圖之遽復委貺有加不
已讀之不覺汗下於是不腆之罪不知所文矣不審久
要尚或見存已否雨不止日來侍奉起居何似瞻望舍
館倍深約結

姑溪居士前集卷二十七